

A JE' JU'UNA', PACHIR CAJ U CA' TS'IBTA PABLO TI' U YET ACSA'ORIROB ICH U CAJAR **CORINTO** **2 CORINTIOS**

*Pablo caj u ts'ibtaj ti' a mac a cu much'quinticob
u b_λjob quir u yubicob u t_λn C'uj ich u cajar Corinto*

¹ A teno' Pablojen, p'eri'en yejer Timoteo, ij quet acsa'orirex, tan in ts'ibticob techex a je' ju'una'. C'uj caj u teten soc y_λj tseq'uiren Jesucristo quir in beyaj ti', quire' tsoy tu t_λn Jesús, rajen quin tsec'tic u t_λn. Tan in tuchi'ticob a je' ju'una' soc a xaquiquex, a mac a yacsm_λnob tu yorob ich u cajar Corinto quet yejer a mac C'uj y_λninob, a mac a c_λja'an ich tu cotor u ru'umin Acaya. ² A teno' in c'at C'uj ic Tetex ca' u yam techex soc m_λna' ba' ca tucriquex. Bayiri' xan, in c'at techex aro' ic Jaj Ts'urirex Jesucristo.

A ba' muc'yajna'jij Pablo ti' a mac a m_λ'yerob C'uj

³ Ca' ij carex ti' C'uj, a mac u Tet ic Jaj Ts'urirex Jesucristo: "Bayo' C'uj, tech ta tucrenob, rajra' tan a chichquintic in worob." ⁴ M_λ' ja wirej, raji' cu chichquintic ij corex wa ber cu c'uchur to'onex tu cotor muc'yaj. Rajen, c'ucha'an ij corex ic chichquintiquex u yorob ij quet acsa'orirex wa ber cu muc'yajjob, quire' C'uj caj u chichquintaj ij corex tu muc'yajna'jo'onex uch. ⁵ M_λ' ja wirej, a mac a yacsm_λnob tu yorob, bin u ca' tar

u muc'yajob an ten bic muc'yajn_λijij Cristo uch soc u c_λnico_b Cristo, chen raji' cu chichquintic ij corex wa ber quic muc'yajex. ⁶ A tenobo' tan in muc'yajob baje'rer soc c'ucha'an in worob in chichquinticob a worex, bayiri' soc je' u to'car a pixamex. Wa ber C'uj cu chichquintic in worob, jeroj je' a wiriquex bic tabar xan cu bin chichquintic a worex C'uj. Bayiri' bic tabar cu bin tacbir a pixamex ten C'uj. Quire' wa ber cu tar techex a muc'yajex an ten bic muc'yajn_λjenob, a tenobo' in c'atob a qui' muc'tiquex a muc'yajex a tan u tar techex. ⁷ Ma_λ' naclr in worob quire' a techexo'. Ma_λ' ja wirej, in werob wa ca muc'yajex xan an ten bic a tenobo' muc'yajn_λjenob je' u chichquinta'r a worex xan.

⁸ A tenobo' in c'at in c'asicob techex, in wet acsa'orirex bic tabar muc'yajn_λjenob tar ich u ru'umin Asia. Quire' jach manan muc'yajn_λjenob soc orac m_λna' in worob, rajen in werob wa je' in quimenobe'. ⁹ A tenob in werob je' u c'ubiquenobe' a tenobo' soc in quinsa'ob. Ma_λ' ja wirej, a ba' in ber a tenobo' tarij quire' C'uj soc in c'ubic in b_λjob ti' C'uj, a mac cu ric'sic mac ich u quimirir soc u w_λc'_λs cuxtar. Tarij soc in c_λnico_b wa ma_λ' in muc'ticob in b_λjiri'ob tin junanob. ¹⁰ Chen C'uj caj u joc'sen a tenobo' tu tabar u ch'esiquenob a tenobo'. Ra'iri' C'uj xan je' u joc'siquen a tenob a ra' u q'uinin a cu taro', rajen quin wacsic tin worob wa je' u rajra' joc'siquenob soc in to'carob a tenobo'. ¹¹ Wa ca yamtiquenobex quire'tan a t'_λnic tenob C'uj. Wa jaj ix ti', ya'ab mac cu t'_λnicob C'uj tenob, ya'ab mac cu bin ya'arej: "Bayo' C'uj" quire' ta wesaj a tenob u jach tsoyir

a pixam.

Biquin mΛ' seb binij Pablo ich u cajar Corinto

¹² A tenob jach qui' in worob caj in wu'yajob quire' caj in betob tsoy techex, a mac a ti' yΛnob ich yoc'ocab. A tenobo' caj in p'is in bΛjob soc in manob tu tsoyir. A baywo' caj in betob wa ber ti' yΛnenob yejerechex uch, quire' tu yamtajenob C'uj. A tenobo' mΛ' jin najtob ba' an ten bic mac ich yoc'ocab cu chen najticob ba'. ¹³ A techexo', a werex aro' jach taj. A tenobo' mΛ' tin wa'arajob u jer t'Λnob ich u jer u ju'unin caj in tuchi'techex uch, jari' a ba' c'ucha'an a worex a xaquex a wirex. Bayiri' a ba' tan a najtiquex, an bic quin pajicob cu c'uchur tu q'uininin je' a qui' najtiquexe'. ¹⁴ MΛ' ja wirej, ta chΛc najtex chichin ragen je' u qui' tar a worex quire' a tenobo', bayiri' xan je' u qui'tar in worob quire' a techexo' ca' bin c'uchuc tu q'uinin ca' bin uruc ic Jaj Ts'urirex Jesucristo.

¹⁵ A teno' in jach er tu jaj aro'. Rajen in wer in man pΛyber tu yΛn techex soc a baywo' quic pacran iric ic bΛjex tu ca'ten, mΛ' chen turiri' quij quiric ic bΛjexi'. ¹⁶ Quire' in wer wa ber quin bin ich u ru'umin Macedonia ti' quin bin man tu yΛnechex. Bayiri' ca' bin uquen tu ru'umin Macedonia ti' quin bin wΛc'Λs man tu yΛnechex. In c'at a yamtiquenex soc c'ucha'an in wor in bin tu ru'umin Judea. ¹⁷ Ra' in jach c'at in wirechex uch, chen a teno' mΛ' tareni'. Jaj ix tΛcoj ca tus tu-criquex a teno' quin betic an ten bic mac cΛja'an te' ich yoc'ocab cu chen beticob. Robob cu ya'aricob cu bin u beticob ba', chen robob yerob mΛ' ju bin u beticobi'. ¹⁸ MΛ' ja wirej, a C'uko', raji' jach taj yor

C'uj, rajen mΛ' in manob in cacay tsicbΛtob. ¹⁹ A tenobo' caj in tsec'tob techex u t'Λn Jesucristo uch, raji' u parar C'uj aro' mΛ' cacay caj in tsec'tob xan. Bayiri' xan, caj in tsec'techex quet yejer Silvano yejer Timoteo. Tu cotorenob caj in tsec'tob techex caj in wa'arob techex wa Cristojo' raji' taj. ²⁰ MΛ' ja wirej, raji' Cristo caj u nup'saj tu cotor u t'Λn C'uj a tu toc araj C'uj uch. Rajen tan ic sΛjtiquex C'uj wa quij cacsiquex tij corex ti' u parar C'uj. ²¹ U bΛjiri' C'uj tan u chichquintic ij corex soc mΛ' ic p'Λtiquex Cristo soc p'eri' ij corex yejer Cristo. Raji' C'uj caj u ts'aja tenob in beyajob. ²² A C'uko' caj u tetenob soc raji' yΛninob a tenobo'. In werob quire' tu chaj u Taj'or u Pixam C'uj u cΛjtar tin pixamob soc in werob yΛn toj quir u tar u nup'sej a ba' u toc aramΛn C'uj.

²³ A teno' quin wa'aric techex ΛcΛtan C'uj raji' yer wa taj quin wa'aric techex. A teno' in wer mΛ' jin tar in wirechex uch quire' in wer bin in ca' in q'ueyechex quire' a ba' ta betajex uch. ²⁴ A tenob mΛ' in c'at a ts'urintiquenex, mΛ' jin ts'Λrob a pachex quir a wacsiquex ta worex. MΛ' ja wirej, p'eri' in beyajob yejerechex soc qui' a worex quire' tan a qui' acsiquex ta worex ti Cristo.

2

¹ Rajen in wer wa jach tsoy mΛ' jin wΛc'Λs tar in wirechex, quire' wa taren ca'ch jari' u yajij a worex ta wu'yajex ca'ch. Quire' a teno' wa taren ca'ch bin in ca' in q'ueyechex quire' a ba' caj a betex uch. ² MΛ' ja wirej, wa ja teno' caj in yajquint a worex ca'ch mac cu bin u qui'quintic in wor a teno'? Jari' techex c'ucha'an a worex

a qui'quintiquex in wor. Chen mΛ' c'ucha'an a worex a qui'quintiquex in wor wa ber quin q'ueyiquechex quire' je' u yajtar a worex tene'. ³ A teno' caj in ts'ibtaj techex a ra' t'Λn uch soc mΛ' in tucur wa ber quin c'uchur tu yΛnechex. MΛ' ja wirej, in c'at a qui'quintiquex in wor quire' in wer a bΛjiri'ex je' u qui'tar a worex wa ber ca wiriquex qui' in wor quire' techex qui' a worex. ⁴ Wa ber caj in ts'ibtaj techex a ray ju'uno' uch, choc in wor tin pixam, bayiri' jach c'ux in wor quire' techex a ba' ta betex. Jach oc'ar in ca' quire' techex ta betex ba'. MΛ' ja wirej, mΛ' in c'at in yajquintic a worex, chen in c'at ca' a c'Λ'otex biquinin jach manan in yajquintiquechex tu cotor.

Jawsex u si'pir a mac a tu raq'uintaj u rac'uyum

⁵ Wa mac tu c'uxquinta yor mac, mΛ' tu chen c'uxquinta tin wor a teno', tu c'uxquinta ta worex techex. MΛ' ja wirej, tu c'uxquintaj orac tu cotor a worex. ⁶ An bic ta q'ueyex a ray xibo' a tu pΛy u si'pir ca'ch, ti'ti' baje'rer. Arex ti' a wet acsa'orirex soc u ts'ocsic u q'ueya'r quire' q'ueya'b ten ya'ab mac. ⁷ Chen a baje'rero' ca' a yΛn jawsex u si'pir, ca' a chichquintex u yor soc mΛ' u tupsa'r yor, soc mΛ' u bin tu pach. ⁸ Rajen quin wa'aric techex ca' a ts'ajex yer soc caj a jach yajquintex a ti'o'. ⁹ Rajen caj in ts'ibtaj a ray ju'uno' ti' techex soc in wu'yic wa ta muc'tex wa ber caj in tumt a worex. A teno' in c'at in wu'yic wa rajra' ca bin a quibex in t'Λn a quin toc aric techexo'. ¹⁰ Wa ber ca jawsex u si'pir mac baxuc a teno' quin jawsic u si'pir xan. A teno' caj in jawsaj u si'pir Λctan Cristo wa yΛn ba' quir in jawsic, quin jawsic quire' techex. ¹¹ MΛ'

ja wirej, ca' ic jawsex u si'pir soc c'ucha'an ij corex ti' a quisino'. Baxuc quin wa'arico' quire' ij querex bic tabar cu tucric a quisino'.

A ba'jac'sa'b yor Pablo ich u cajar Troas

¹² Caj c'uchen ich u cajar Troas uch quir in tsec'tic u jach tsoyir u t'ʌn Cristo, u winiquirob tu cajar caj u pachtob yubob u t'ʌn Cristo quire' C'uj toc tər u pixamob. ¹³ Chen mʌ' tsøy in tucur quire' mʌ' jin nupa ti' taro' in wet acsa'orir Tito. Rajen caj in t'ʌnaj ti'ob a ray winiquirob quire' bin in ca' caj binen ich u ru'umin Macedonia.

Je' u joc'ar u tsoyir tu cotor ba' quire' Cristo

¹⁴ Ca' ij carex ti' C'uj: "Bayo' C'uj, quire' rajra' tech tan a yamtiquenob soc c'ucha'an in worob tu cotor ba' quire' tech C'uj ta p'eri'quin tenob yejer Cristo." Rajen C'uj caj yam to'onex soc ic masiquex u t'ʌn ich tu cotor mac ich yoc'ocab soc yerob biquira' C'uj. Bayiri' tan u qui'quintic ij corex u t'ʌn c'uj. ¹⁵ A baywo', tan ij qui'quintiquex u yor C'uj quire' cu yiric to'onex tan ic tsec'tiquex u t'ʌn Cristo ich tu cotor mac. Wa ber mac cu yubicob ic tsec'tiquex u t'ʌn C'uj yʌn mac cu yacsicob tu yorob ti' u t'ʌn C'uj, jeroj raji'ob toc ten C'uj. Yʌn mac u jer mʌ' ju yacsejob tu yorob ti' u t'ʌn C'uj, jeroj raji'ob satər u ca'ob. ¹⁶ Rajen yʌn mac je' u toc satər quire' mʌ' u c'at u t'ʌn C'uj. Bayiri' xan yʌn mac je' u bin tocar ten C'uj quire' u c'atob u t'ʌn C'uj. Ay, bic tabar yaj ic beyajex! ¹⁷ Mʌ' ja wirej, a tenobo' mʌ' in betob an ten bic u jer mac tan u beticob, raji'ob tan u masicob u t'ʌn C'uj quir u jaricob u taq'uinob. A tenobo' ʌcʌtan ti' C'uj ts'aja'an in worob in tsec'ticob u t'ʌn C'uj quire'

raji' tu tuchi'tenobo'. A tenob quin tsec'ticob a ba' tajo'.

3

U t'ʌn C'uj irej wa ric'ben

¹ Wa ber caj in ts'ibtob techex aro', a techexo' mʌ' a yʌn turiquex wa tan in wʌc'ʌs aricob wa tsoyir in bʌjob soc a tus tucriquex wa jach caremenob. A tenobo' mʌ' ba' wir quir in wesic techex ju'un a cu tsicbar jach tsoy t'ʌn a tenobo'. A bʌjiri'ex a werex bic tabar a tenobo', bayiri' xan u jer yerob xan.
² Mʌ' ja wirej, chʌca'an yiric mac wa tin betob a tsoyo' tu yʌnechex uch, quire' a techexo' caj a c'ax ta worex ti' C'uj caj a p'ʌt a manex ich a si'pirex. A baywo' chʌca'an yiricob a rac'obex biquira' a pixamex. ³ Robob chʌca'an yiricob wa irechex turiri' ju'un toc ts'ibta'b ich yoc'or ten u bʌjiri' Cristo. A ra' ju'uno' tin toc c'ubob ti' a rac'obex ich a cajarex. A ba' ts'iba'an ich yoc'or mʌ' ts'ibta'b yejer u jach a'arir ts'ib, chen ts'ibta'b ten u Taj'or u Pixam C'uj a mac cuxa'an. U t'ʌn caj u ts'ibtaj aro' mʌ' ts'iba'an ich yoc'or tunich an ten bic uch tu q'uinin in nunquirirob Moisés caj ts'ibta'b ten C'uj. Mʌ' ja wirej, ti' ts'iba'an ich a pixamex.

⁴ Rajen taj quin wu'yic tin worob quire' C'uj. Mʌ' ja wirej, Cristo caj u betaj aro'. ⁵ A tenobo' quin wu'yicob tin worob wa jin nonoj bʌjiri'ob mʌ' c'ucha'an in worob ti' a ray beyajo', chen a C'uko' cu chichquintic in muc'ob soc in beyajob ti' soc in man in tsec'tob u jach tsoyir u t'ʌn, a ric'beno'. A je' t'ʌna', mʌ' ra' u t'ʌn a uchbeno' a tu ts'ib in nunquirirob Moisés a ucho'. ⁶ Mʌ' ja wirej, u

t'ʌn Moisés ra' cu ya'aric bin ij ca' quiminex quire' tan ic manex ich ic si'pirex. Chen u t'ʌn a quin tsec'ticob ra' u t'ʌn a cu camsic u Taj'or u Pixam C'uj. A je' t'ʌna' cu ts'ic ij cuxtarex.

⁷ Jach jaj jach tsoy u t'ʌn C'uj a uchbeno' a ts'iba'an ich tunich uch. Jari' ra' cu taquic ic jo'rex quire' yʌn ic si'pirex. A ray u q'uininino' Moisés caj u c'ʌmaj u t'ʌn C'uj, u wich Moisés caj u chucaj u sasirir C'uj tu ch'ica'an yejer C'uj. Rajen u winiquirob israel mʌ' c'ucha'an yor u pʌcticob uch u wich Moisés quire' u sasirir cax tabar u jawar u sasirir C'uj u wich ich Moisés. ⁸ Chen a techexo' a werex jach manan tsoy u t'ʌn C'uj a tu ts'aja to'onex u Taj'or u Pixam C'uj. ⁹ Jach taj u t'ʌn C'uj a uchbeno' a caj ts'ab ten C'uj ti' Moisés a ucho'. A ra' u q'uininino' caj u ch'aj sajquirob u winiquirob israel. Cax cu ta'quic u jo'rob quire' yʌn u si'pirob, cax quic ch'ic sajquirex ti' u t'ʌn a ric'beno', jach manan tsoy quire' cu ya'aric bic tabar C'uj cu c'ʌmico'onex. ¹⁰ Mʌ' ja wirej, a ucho' jin werob a t'ʌno' a uchbeno' jach tsoy an ten bic ts'abir ten C'uj, chen u t'ʌn a ric'beno', a yʌn to'onex baje'rer jach manan tsoy. ¹¹ A t'ʌno' a ric'beno', a je' t'ʌna' je' u p'atʌr munt q'uin quire' jach manan tsoy. Chen u t'ʌn a uchbeno' cax tsoy, u tsoyir tan u man.

¹² Rajen mʌ' in ch'a'ej sajquirob in tsec'ticob u t'ʌn C'uj. ¹³ Mʌ' ja wirej, a tenobo' mʌ' irenob in nunquirob Moisés, quire' raji' tu pix u wich yejer noc' soc u winiquirob israel mʌ' u pʌcticob u wich quir u yiricob wa ju sasir u wich tabar u jawar u sasirir C'uj tu wich Moisés. ¹⁴ U winiquirob

israel u berer baje'rer mΛ' ju najtob a ba' tu ts'ibt u nunquirob Moisés uch, cax cu qui' cΛxticob a ba' ts'iba'an ti' ich u t'Λn a uchbeno', mΛ' ju najtobi'. Quire' mΛ' ju najtob wa Cristo tu toc rΛc nup'saj a ba' ti' yΛn a ti'o'. ¹⁵ Jach taj u berer baje'rer raji'ob mΛ' ju najtob cax cu qui' cΛxtic ich u t'Λn u nunquirob Moisés. ¹⁶ Ca' bin c'uchuc tu q'uinin cu yacsicob tu yorob ti' ic Jaj Ts'urirex, jeroj je' u najticobe'. ¹⁷ MΛ' ja wirej, ic Jaj Ts'urirex yejer u Taj'or u Pixam C'uj robob quet bayiri'. Jeroj a mac a ju yet man u Taj'or u Pixam C'uj toc ruc'sa'b ti' u t'Λn Moisés, a ra' cu ya'aric mac cu bin ts'a'bir u muc'yaj. Toc sipta'b ti'. ¹⁸ MΛ' ja wirej, mΛna' ba' cu pixic ij quichex. A tenobo' irenob nen tan in wesicob u jach caremir C'uj. Quire' chan chanber tan u waysico'onex soc tsoyo'onex an ten bic tsoy ic Jaj Ts'ururex. Jesús tan u betic to'onex aro' quire' aca'an tic pixamex u Taj'or u Pixam C'uj.

4

¹ Rajen mΛ' biq'uin tupsa'an in worob quire' C'uj, a cu tucric maco', caj u c'ubenob beyajob, ra' quir in manob in tsec'tob u t'Λn. ² Toc jumpuri' mΛ' in betob a c'aso', bayiri' xan, mΛ' jin pachtob in tusaricob ti' mac, mΛ' jin jenmastob u t'Λn C'uj xan. MΛ' jin soso' arob u t'Λn C'uj quire' taj quin wa'aricob ti', soc mac tu cotor c'ucha'an yorob yiricob wa tsoy in beticob ΛcΛtan ti' C'uj. ³ Jach taj u t'Λn C'uj a quin tsec'ticob ti' mac soc yerob bic tabar u jawΛr u si'pirob, ra' mΛ' quet cu najticob a mac a cu satΛrobo'. ⁴ MΛ' ja wirej, a quisino', a mac a cu pΛyic u ber a mac a mΛ' yer C'uj. A quisino' mΛ' ju ts' u tucur mac soc u najticob u

t'Λn ic Jaj Ts'urirex, bayiri' soc u c'Λmicob u jach tsoyir u t'Λn C'uj. Rajen mΛ' c'ucha'an yor yerob u caremir ic Jaj Ts'urirex, a mac irej u bΛjiri' ic Tetex C'uj. ⁵ A tenobo' mΛ' in tsec'ticob bic tabar a tenob. A tenob quin tsec'ticob bic tabar ic Jaj Ts'urirex. Quin wa'aricob wa quin yamticob mac tu cotor quire' Jesucristo ic Jaj Ts'urirex a ju yajo'onex. ⁶ A tenobo' quin tsec'ticob u t'Λn Cristo quire' C'uj, raji' caj u ya'araj: "A quibo' ca' u sasiquint tu yac'birir." Baxuc tu ya'araj C'uj. MΛ' ja wirej, caj u ts'aj in najticob rajen in werob biquira' C'uj, a mac jach manan caremo' an ten bic Cristo tu ts'aj u tucur C'uj ti' a tenobo'.

Bic tabar quic manex tu tsoyir

⁷ Chen a tenobob mΛ' patarenobi' a mac a yΛn a je' jach tsoy u t'Λna' soc chΛca'an yiricob mac jach manan carem ij C'ujirex, a mac jach chich u muc' xan. A tenob, mΛ' chen ten yΛnin a ray u muc'o' quire' C'uj yΛnin. ⁸ YΛn ba' in berob tu quin binob. Chen a C'upo' cu ruc'sa'r u c'Λbob tenob soc mΛ' u chuquiquenob. A tenobo' c'Λs tucur in ca'ob, chen mΛ' choc in worob tenob. ⁹ Wa ber cu chuquicob in pachob mΛ' jin wu'yob wa tu p'Λtajenob C'uj. Cax jats'ob in pachob chen mΛ' ch'esa'benobi'. ¹⁰ Cax tu quin c'uchurob, quin c'ubic in bΛjob soc in quinsa'ob an ten bic Cristo caj u betaj, a mac quinsa'b ich cruz. Quire' a jeroj mac tu cotor je' u yerticobe' wa Jesús raji' a mac cuxa'an quir u yamtenob a tenob. ¹¹ Chen a tenob ti' toy cuxa'anenob, chen yΛn mac u c'at u quinsiquenob quire' ra' u yajir in wacsic tin wor ti' Jesucristo. A baywo' c'ucha'an yor yiricob mac wa

Cristo tan u yamtiquenob soc in cuxtarob te' ich yoc'ocab. ¹² A tenobo' jach ya'ab tan in muc'yajob, bayiri' xan tabar in quiminob, chen C'uj tan u beyaj yejerechex soc a cuxtarex.

¹³ U'yex ba' cu ya'aric ich u t'ʌn C'uj: "A teno' quin wacsic tin wor ti' a t'ʌn rajen tsicbʌnʌjen." Baxuc cu ya'aric ich u t'ʌn C'uj. A tenobo' quin wacsic tin worob an ten bic mac caj u ts'ibtaj a ray t'ʌno', a baywo' quin tsicbarob u t'ʌn quire' tin wacsob tin worob. ¹⁴ A tenobo' in werob C'uj je' u ric'sico'onex ich u quimirir soc ij cuxtarex yejer Jesucristo quire' tu ric'saj ic Jaj Ts'urirex ich u quimirir soc u cuxtar. Jeroj p'eri'o'onex ich ca'anana je' ij cuxtarex. ¹⁵ Baxuc caj u betaj C'uj techex. Mʌ' ja wirej, a techexo', a mac C'uj yʌninechex, je' a jach pimtarex quire' je' u man u t'ʌn C'uj nach ich tanxer ru'um. A baywo' ya'ab mac, quire' tsoy tu t'ʌn C'uj, bin u ca' ya'arob: "Bayo' C'uj." A baywo' cu yesicob bic jach carem ij C'ujex.

¹⁶ Rajen mʌna' ba' cu tupsic in worob, cax tan u jach nuxibchʌjʌr in winquirob, a jin pix-amob, rajra' tan u chichquinta'r u muc'ob ten u Taj'or u Pixam C'uj. ¹⁷ A tenobo' tan in c'ʌs muc'yajob baje'rer. Mʌ' ja wirej, a je' muc'yaj a quin muc'yajob baje'rer tan u pʌyiquenob u tsoyir C'uj a mʌ' u ts'ocar biq'uino'. ¹⁸ A tenobo' mʌ' tan in tucricob ti' a ba' chʌca'an in wiricob a tera' ich yoc'ocab. Chen a tenobo' tan in tucricob a ba' to'onex mʌ' toy ij quirex. Mʌ' ja wirej, a ba' quiriquex baje'rer mʌ' ya'ab u q'uinin ti' yʌn, chen a ba' mʌ' toy ij quirex aro' munt q'uin ti' yʌni'.

5

¹ A to'onex ic winquirirex irob yatoch a ju rab^λrob tu quij c^λjarex. Rajen ic toc erex ti' y^λn u jer ric'ben ich ca'an an tu quic binex c^λjarex wa jic winquirirex cu ch'ejar. A ray u winquiriro', m^λ' irej yatoch a xibo' cu c'λxico' quire' aro' cu rab^λr. U winquirir a cu bin ts'abir ten C'uj to'onex m^λ' ju rab^λr quire' C'uj cu bin u betic ti', soc munt q'uin ti' y^λn. ² Jach taj a to'onexo', a mac yer C'uj jach tucur ij ca'ex quire' ti' toy y^λno'onex ich yoc'ocab. Quire' quic jach pachtiquex ij c^λjarex ich ca'an an ich C'uj soc y^λn to'onex ric'ben ic winquirirex. ³ Tu quic bin ij c^λjarex ich ca'an an, je' u y^λntarex ric'ben ic winquirirex, rajen m^λ' c'ucha'an ij corex ij cariquex m^λna' ij winquirirex. ⁴ A mun u q'uinin ti' toy y^λno'onex te' ich yoc'ocab quic xobex quire' tan ic muc'yajex. A teno' m^λ' in c'at in wa'aric wa in c'at in p'^λtic in winquiriro'. Chen a teno' in c'at in c'λmic u jer ric'ben. Chen jach manan tsøy ca' xico'onex ich ca'an an tu y^λn C'uj quir ij c^λjarex tu m^λ' ju quimin mac. ⁵ M^λ' ja wirej, a C'uko' tu toc nup'sa a ba' tu tucraj quire' tu toc bet aro'. Bayiri' xan, tu tuchi't u Taj'or u Pixam C'uj soc u p'at^λr tij quicn^λnex, rajen ij querex je' u joc'ar u tajir a cu bin u ts'ic to'onex aro' tsøy.

⁶ Rajen jach manan qui' in worob quire' in werob ti' toy cuxa'anenob te' ich yoc'ocab m^λ' toy xiquenob ich tu y^λn ic Jaj Ts'urirex. ⁷ Chen tan ij quet manex yejer mac a ju t'^λn a tij quibex a mac a m^λ' ij quirex. ⁸ Jach qui' ij corex. M^λ' ja wirej, ts'aja'an ij corex ij c^λjarex tu y^λn ic Jaj Ts'urirex soc ic p'^λtiquex a je' ic winquirirex. ⁹ Rajen in c'at in qui'quinticob u yor ic Jaj Ts'urirex, cax wa

cuxa'anenob te' ich yoc'ocab, cax wa cuxa'anenob tu y^{an} ic Jaj Ts'urirex. ¹⁰ M^a' ja wirej, tan u tar u q'uinin u xur t^{an} wa ber cu tumtic ij corex tu cotoro'onex Cristo an ten bic cuxraja'anonex te' ich yoc'ocab uch. A ra' u quinino' je' u ts'ab^aten Cristo ti' jujunturo'onex u bo'orir a ba' tic betex u q'uinin ti' y^{an}o'onex ich yoc'ocab uch cax wa tsoy cax wa m^a' tsoy.

Cristo tu quetquint ij corex ti' C'uj

¹¹ Quire' rajen aro' quin ch'ic sajquirob ti' C'uj, rajen quin man in tsicbatob C'uj soc u yacsicob tu yorob ti' Cristo. A C'ijo' yer a ba' tan in camsicob bayiri' xan, in c'atob a werex ta worex xan a ba' tan in camsicob. ¹² A tenobo' m^a' tan in wa'aricob techex wa jach tsokenob xiben, chen a tenobo' in c'atob a qui'quintiquex a worex yejeren soc a werex bic tabar a nunquiquex a mac a qui' yorobo' yejer mac a tus tsoyo', chen m^a' u jach erob biquira' u pixam. ¹³ Jot a ba' cu tucric mac a tenobo', cax cu tucricob m^a' in wer ba' quin beticob quir in yamtiquechexo'. A tenobo', je' in beticob a ba' u c'at C'uj cax a ba' quiri' u c'at a ti'o'. ¹⁴ M^a' ja wirej, a Cristojo' jach manan u yajenob rajen quin jach p'isic in b^ajob quir in beticob a ba' u c'at. M^a' ja wirej, a Cristojo' caj quimij ti' tu cotor mac, rajen robob irob r^ac quimenob. ¹⁵ Cristo caj quimij soc u taquic tu cotoro'onex. Baje'rer m^a' jic tucrex ic b^ajiri'ex ic betiquex. Jari' baje'rer quij cuxtarex quir ic betiquex a ba' u c'at Cristo, a mac quimij ca' w^ac'as riq'uij. ¹⁶ Rajen tu q'uinin baje'rer hasta quij quiminex m^a' jic y^{an} iriquex mac irej wa chen winic. Cax a ucho' caj in wiraj

Cristo irej wa chen winic. A baje'rer a teno' mΛ'tan in wiric Cristo an bic chen winic quire' tin c'axaj tin tucur baje'rer. ¹⁷ Rajen a mac a tu yacsob tu yorob ti' Cristo robob ric'benchΛjob u pixamob. A ba' cu tucricob baje'rer toc c'axa'an, rajen tu p'Λtob a tu cu manob uch. An bic cu manob baje'rer toc ric'ben.

¹⁸ Tu cotor aro' caj beta'b ten C'uj quire' Cristo. MΛ' ja wirej, a C'uko' caj u masaj to'onex ich a ric'ben bejo'. Baje'rer tsoy yirico'onex C'uj quire' Cristo tu toc bo'ot u bo'orir ic si'pirex. Caj u ts'ajaj a tenob in beyajob soc in manob in wa'arej ti' u jer macob soc tsoy yiricob C'uj. ¹⁹ U'yex bic tabar a ray t'Λno'. A C'uko' caj u tuchi'ta Cristo quir u quetquintic yor C'uj yejer mac soc pacran tsoy ij quiriquex ic bΛjex, rajen C'uj mΛ' ju tucrej wa yΛn ic si'pirex. Raji' tu ts'ajaj a tenob in beyajob ca' manquenob in wa'arob bic tabar u jawar u si'pir mac. ²⁰ Rajen tarenob yΛjtseq'uirenob Cristo quir in beyajob ti'. A tenobo' quin tsec'ticob u t'Λn C'uj, chen C'uj, raji' tan u chich aric ti' mac. A tenobo' quin chich aricob techex ΛcΛtan ti' Cristo: "Ca' yiriquechex tsoyechex C'uj." ²¹ A Cristojo' mΛna' u si'pir chen tar quir u bo'otic u bo'orir ic si'pirex, a C'uko' caj u tuchi'taj ca' quinsa' ich cruz ti' ic si'pirex. Rajen ΛcΛtan tu wich C'uj wa ber to'onex quij cacsiquex tij corex ti' Cristo, jeroj toc ruc'sa'b ic si'pirex.

6

¹ Quire' a tenobo' in wet beyajob ti' C'uj. Quin chich aricob techex mΛ' a ma'quintiquex u jach tsoyir u pixam C'uj a ts'a'b ten C'uj techex. MΛ' a

cha'iquex u sat_Δrex. ² M_Λ' ja wirej, ti' ts'iba'an ich u t'_Δn C'uj tu cu ya'aric:

Tu q'uinin a tin p'isaj tin ts'ajaj techex a ba' tsoy tu t'_Δn C'uj. Wa ber ta t'_Δna'anex, quij C'uj, tin wu'yaj a ba' ta wa'araj tenex. Ra' u q'uin caj in yamtaj techex quir in taquiquechex techex, quij C'uj.

M_Λ' ja wirej, toc baje'rer u q'uinin quir a t'_Δniquex C'uj, toc baje'rer u q'uinin quir a taquiquechex a pixamex.

³ A tenobo' quin c_Δxticob bic tabar a ba' quin beticob cu joc'ar tsoy, quire' a tenobo' m_Λ' in c'at mac ya'aric u t'_Δn C'uj a quin tsec'ticob m_Λ' tsoyi'.

⁴ M_Λ' ja wirej, a tenobo' in c'atob tu cotor mac yerob tan in beticob u beyaj C'uj. Rajen quin muc'ticob a mun yajir cu tar tin woc'or. Y_Δn u q'uinin a tenob m_Λna' ten a ba' in jach c'at. Y_Δn u q'uinin mac tan u chuquicob in pach. ⁵ Y_Δn u q'uinin wa ber cu j_Δts'iquenob. Y_Δn u q'uinin wa ber cu yacsiquenob tu cu ma'car winicob. Y_Δn u q'uinin wa ber cu puricob u b_Δjob tin woc'or. Y_Δn u q'uinin wa ber rajra' quin beyajob m_Λ' jin jerarob. Y_Δn u q'uinin m_Λ' jin wen_Δnob quire' a ba' quin beticob. Y_Δn u q'uinin wi'jenob. ⁶ A ba' cu yesic jach tsoy tu quin beyajob a quin manob tu tsoyir. A ba' cu yesic jach tsoy tu quin beyajob ti' C'uj a quin najticob u jach tsoyir u t'_Δn C'uj. A tenobo' quin muc'ticob tu cotor ba' mac cu beticob ti' a tenob. Jach tsoy quin beticob ti' mac. Bayiri' xan, u Taj'or u Pixam C'uj cu yamtiquenob soc c'ucha'an in worob in beyajob ti' C'uj. Jach taj quin yajquinticob tu cotor mac. ⁷ A C'upo' caj u chichquint in muc'ob soc c'ucha'an

in worob in qui' tsicbar a ba' jach taj. A tenobo' jach ts'aja'an in worob in manob ich a tsoyo' soc a baywo' c'ucha'an in worob ti' a c'aso' a ti' y_{AN} ich tu cotor ru'um. ⁸ Y_{AN} mac tsoy yiriquenob tu quin beyajob ti' C'uj. Y_{AN} mac m_A' tsoy yiriquenob tu quin beyajob ti' C'uj. Y_{AN} mac xan, cu tsicbar tsoy tenob. Y_{AN} mac cu tsicbar c'as tenob. Y_{AN} mac a cu ya'aric quin tusaricob ti' mac. Chen a tenobo' rajra' quin tsicbarob u t'_{AN} a tajo'. ⁹ Y_{AN} mac cu ya'aricob m_A' u yerenob a tenobo', chen y_{AN} mac cu ya'aricob u yerenob a tenobo'. Y_{AN} mac u c'at yiricob in quiminob, chen ti' toy cuxa'anenob. Y_{AN} mac cu chuquicob in pachob, chen m_A' toy quinsa'benobi'. ¹⁰ Cax tin wor quin wu'yicob tucur in ca'ob quire' a ba' cu tar tin woc'or, chen tin tucurob jach qui' in worob. Cax otsich_Ajenob, chen a je' t'_{AN}a' a quin tsicbarob ti' ya'ab mac jach tsoy cu betic ti'ob. Cax m_A' ya'ab in ba'tacob, chen a C'ijo' caj u ts'ajaj tenob tu cotor a ba' in c'atob.

¹¹ U'yex ba' quin wa'aric techex in wet acsa'orirex ich u cajar Corinto. Tin toc arob techex a ba' ti' y_{AN} tin pixamob. Ne m_A' biquenob yejerechexo'. ¹² M_A' tan in wa'aric wa m_A' pacran tsoy yiro'onex ic b_Ajex a ba' in jach c'at in wa'aricob ti' techex, chen a b_Ajiri'echexo' ta junanex m_A' a c'atex soc tsoy yirico'onex. ¹³ A tenobo' quin t'_{AN}iquexesob an ten bic u tet cu t'_{AN}ic u pararob. Yajquintex a tenobo' an ten bic in jach yajechedexob.

A C'ijo' cu c_Ajtar tu yicn_{AN} a mac a cu yacsicob tuyorob ti'o'

¹⁴ YΛn macob ich yoc'ocab a mΛ' ju yacsicob tu yorob ti' C'uj. MΛ' a yΛn p'eri'quintic a bΛjex yejerob. MΛ' ja wirej, a mac a cu beticob a tsoyo' mΛ' p'eri' u tucur yejer mac a cu beticob c'as. Robob u tirir ti', an ten bic u sasirir u tirir ti' a yac'biriro'. ¹⁵ MΛ' ja wirej, a Cristojo' mΛ' quet u betej a ba' cu betic a quisino'. Bayiri' xan, yejer a mac a yacsmanob tu yorob ti' Cristo, mΛ' quet u beticob a ba' cu beticob a mac a mΛ' yacsmanob tu yorob ti' Cristo. ¹⁶ Bayiri' xan, ich yatoch C'uj, jari' a C'ajo' cuxa'an, raji' tan u c'ujinta'r ti' taro'. MΛ' ju cha'bΛr u c'ujinticob tus C'uj ti' taro'. MΛ' ja wirej, a C'ajo' cu yiriquechex irej wa techex yatoch C'uj quire' C'uj cu ya'aric:

A teno', in wet man yejer a mac a cu c'ujintiquen a teno'. A teno' u C'ujiren a ti'o' xano', bayiri' xan ten yΛnin a ti'obo', quij C'uj.

¹⁷ A C'ajo' cu ya'aric xan:

Toc p'Λtex tu cΛja'anechex yejer mac a cu beticob c'as. MΛ' a betiquechex a c'aso'. MΛ' a betiquechex a c'aso' a cu beticobo' caso' a baywo' je' in wacsiquechex ich a ca'anano'. ¹⁸ A teno', quij C'uj a Tetenex bayiri' xan a techexo' in chan pararechex. Baxuc cu ya'aric C'uj, a yΛn tu cotor u muc'o'.

7

¹ U'yex ba' quin wa'aric techex in wet acsa'orirex, a mac in jach yaj. A baywo' yΛn to'onex u t'Λn C'uj a tu toc araj ba' cu yΛn bin u betej to'onex. Rajen ca' ic p'Λtex tu cotor c'as a ti' yΛno'. Ca' ic p'Λtex a ba' cu yacsic ic winquirirex ti' ic si'pirex. Ca' ic p'Λtex a t'Λno' a cu c'asquintic ij

tucurex quire' cu p_λyic ic si'pirex. Ca' ic y_λn s_λjtex C'uj. Tan ic ts'iquex ti' C'uj ic pixamex munt q'uin.

*Qui' c_λnant a b_λjex ti' a ba' cu c'asquintiquex ti'
mac a m_λ'yerob C'uj*

² U'yex in wet acsa'orirex ca' a wacsenex ta pixamex. Y_λn yajquintenex quire' a tenobo' m_λ' jin beta c'as techex, m_λ' in wacsob mac u si'pir, m_λ' jin tusarob mac soc u chuquejob ba' tenob. ³ Cax caj in wa'araj aro' techex m_λ' jin p_λc' a pachex wa mac tu betaj c'as. A teno' caj in toc araj techex in jach yajechex. Je' in yajquintiquechex wa mun q'uin cuxa'anen, cax tu ca' in quimin. ⁴ A teno', tin t'_λn je' a quibex a ba' quin wa'aric techex. Tan a qui'quintiquex in wor an bic tabar a manex tu tsoyir. Jach qui' in wor cax tan in muc'yaj, quire' wa ber cu tar tin tucur a ba' ca betiquex jeroj quin qui'quintic in wor.

⁵ Caj c'uchen ich u ru'umin Macedonia uch, m_λ' c'ucha'an in wor in je'sic in b_λj quire' y_λn ba' rajra' tu yajquint in wor, a teno' ya'ab tin wu'yaj. Ti' y_λn ya'ab ba'te'. Tan in tucricob bic tabar wa je' joc'are'. ⁶ Chen a C'uko' cu chichquintic u muc'o' a mac a m_λna' u muc', ragen C'uj caj u chichquint in worob wa ber caj c'uchij Tito tin wicn_λn. ⁷ M_λ' chen qui'jij in wor caj in w_λc'_λs iraj Tito, bayiri' xan jach manan qui'jij in wor quire' caj u ya'araj Tito bic tabar ta chichquintex u yor Tito xan. M_λ' ja wirej, a Titojo' jach qui' yor yejerechex. A Titojo' caj u ya'araj ten xan bic tabar jach tucur a ca'ex quire' ta yajquintex in wor. Raji' caj u ya'araj bic tabar a c'at a wiriquenex. Caj in wu'yaj a ra' t'_λno'

jach ya'ab qui'jij in wor. Caj u ya'araj xan bic tabar ta c'Λ'otenex.

⁸ Wa ber caj in tuchi't in ju'un techex, caj in wu'yaj yaj tin wor quire' u t'Λn a ti' yΛn ich a ray ju'uno'. Ma' ja wirej, in wer je' a wu'yiquex yaj ta worex tucur a ca'ex ti' wa ber caj a xaquex a ray ju'uno' a tin tuchi'ta techex. A baje'rero' mΛ' tucur in ca' quire' caj in ts'ibta techex a ray ju'uno'. Ma' ja wirej, in wer baje'rer jawij a tucurex. ⁹ Baje'rer jach qui' in wor, chen mΛ' qui' in wor quire' tucurnΛjechex uch. Chen qui' in wor quire' ta wesex bic tabar tucurnΛjechex. Ma' ja wirej, ta c'axex ta worex caj a p'Λtex u c'asir a ta betex ucho'. Rajen quin wa'aric techex C'uj caj u bet aro' ragen caj joc' u tsoyir techex. Bayiri' xan, mΛna' c'as ta wu'yex ta worex ti' a teno'. ¹⁰ Ma' ja wirej, a mac a cu yubic yaj tu yor quire' a ba' c'asir tu betaj uch, jeroj tune' caj u c'axaj tu yor caj u p'Λtaj u c'asir an bic tu betaj uch. Jeroj tsoy yiric C'uj, je' u ta'quic u pixame'. Chen wa ti' yΛn mac a mΛ' ju c'at u yacsic tu yor ti' C'uj cax tucur u caj u yor, a ray maco' mΛ' ju bin ta'cbir u pixam. ¹¹ Ma' ja wirej, caj a wac't a bΛjex wa ber ta xaquex u ju'unin quire' a si'pir ta wacsex uch. Ta qui'quintex yor C'uj baje'rer quire' a ba' ta betex baje'rer. C'ucha'an a worex a wirex a ba' a berex pachir caj a wu'yex a ba' si'pir ta wacsex a si'pirex uch. Ta jach acsex ta worex quire' ta ch'a'ex sajaquirex ti' C'uj quire' a werex je' u ts'ic a muc'yajex C'uj. Rajen ta chichquint a worex quir a q'ueyiquex a mac a tu yacs u si'pir uch. Baxuc caj a wesex mΛ' quet a worex yejer u si'pir a tu betaj uch. Jeroj baje'rer a c'atex a wiriquenex. ¹² Wa ber caj in ts'ibtaj techex a ray ju'uno' a tin tuchi'techex,

a teno' m^Λ'jari' in c'at in ts'ic u muc'yaj ti' a mac a tu yacs u si'pir uch. M^Λ' in c'at in yamt aray winico', a beta'b c'as ti' ten, a tu yacs u si'pir uch. Chen a C'ujer yer a ba' in c'at in betej uch. M^Λ' ja wirej, a teno' in c'at in wu'yic wa Δ c Λ tan ti' C'uj quet pacran p'eri' ij corex, ta quibex in t' Λ n uch. ¹³ Rajen ta chichquintex in wor baje'rer.

Bayiri' jach qui' in wor quire' tin wiraj Tito qui' yor quire' ta qui' acsex tu y Λ nechex. ¹⁴ Wa ber m^Λ' toy xic Tito tu y Λ nechex uch, a teno' caj in wa'araj ti', je' a quibiquex in t' Λ n a caj in tuchi'tatechexo'. A baxuco' caj in wa'araj ti' Tito uch a baxuc ra'iri' caj a betex. A baxuco' ch Λ ca'an yiric mac jach jaj a ba' caj in wa'araj ti' Tito an ten bic ti' y Λ nen yejerechex uch, tu cotor a tin wa'araj techex jach taj xan. ¹⁵ Rajen baje'rer Tito jach manan u ya-jquintiquechex quire' tu cotor u t' Λ n caj u ya'araj techex uch a techexo' ta quibex. M^Λ' ja wirej, tu cotor u t' Λ n Tito caj u ya'araj techex uch jach ts'aja'an a worex a betexi'. ¹⁶ A teno', baje'rer, tan in qui'quintic in wor quire' in wer jach taj je' a betiquex a tsoyo'.

8

Bic tabar u ts'ic ta'quin ti' C'uj

¹ U'yex ba' quin wa'aric techex in wet acca'orirex. A teno' in c'at in wa'aric techex bic tabar a yacsma Λ nob tu yorob ich u ru'umin Macedonia, a tu c Λ ja'anob tu chan cajarob caj joc'ob tsoy a ti'obo' quire' yamta'bob ten C'uj. ² Robob cax otsich Λ job quire' chuc u pachob ten mac tu y Λ nob, chen jach manan qui' yorob. Cax otsich Λ job, tan u yamticob u yet acsa'orirob.

Robob cu ts'icob u taq'uinob irob wa jach ya'ab u taq'uinob. ³ A teno' taj quin wa'aric techex ti'ob, cax wa ja ba' cu yamicob u yet acsa'oriob tan u ts'icob quire' u yajob. Ma' ja wirej, a mun caj u tucrob u ts'ic ti'ob uch jach manan ya'ab caj u ts'ajob ti'ob. ⁴ Robob, a mac a caja'anob ich u ru'umin Macedonia, caj u chich c'atob ten ca' in c'äm u taq'uinob quir in ts'ic ti' a yacsmanob tu yorob ich u cajar Jerusalén.

⁵ A baywo' caj u betob, chen ma' an ten bic caj in tucraji'. Robob pauber u bajarirob caj u yan c'ubob u baj ti' C'uj soc raji' yanin a ti'obo'. A baywo', caj u yanxchun u c'aticob u yamtenob an ten bic C'uj u c'at. ⁶ Wa ber caj in wu'yaj winiquirob ich u ru'umin Macedonia tan u yamicob u yet acsa'oriob uch, bayiri' mun cu ts'icob ti'ob. Caj in wa'araj ti' Tito ca' wac'as xic tu yanechex soc u chichquintic a worex uch soc rajra' a much'quintiquex a taq'uinex quir a yamtiquex yejer a taq'uinex a ta yanxchun a much'quintiquex uch. ⁷ A techexo' tan a betiquex tsoy ich tu cotor a ta yan betex uch. Tan a qui' acsiquex ta worex, bayiri' xan, tan a qui' najtiquex ba', tan a qui' tsicbarex xan, bayiri' tan a pach-tiquex a manex tu tsoyir. Bayiri' tan a yajquintiquenob. Bayiri' xan baje'rer, in c'at ca' a qui' yajquintex a wet acsa'orirex xan, tan a ts'iquestiob a ba' u c'atob baje'rer.

⁸ A teno', ma' tan in wa'ariquechex a je' t'ana' irej wa tan in ts'ic u t'anin techex soc a yamtiquex a wet acsa'orirex. Tan in wa'ariquechex aro' soc a wesiquex ti' tu cotor mac taj tan a yajquintiquex a wet acsa'orirex. Ma' ja wirej, jun yarob mac a

yacsm^λnob tu yorob ts'aja'an yorob quir u yamticob u yet acsa'orirob. ⁹ M^λ' ja wirej, jach ch^λca'an ij quirex u jach tsoyir u pixam C'uj a ts'a'b ten ic Jaj Ts'urirex Jesucristo to'onex. Iric raji' Jesús y^λnin tu cotor ba' a ti' y^λn chen raji' u b^λjiri' caj otsich^λjij quire' u yajo'onex. A b^λje'rero', quire' u b^λjiri' otsich^λjij rajen u jach tsoyir u pixam C'uj jach manan cu c'uchur tu y^λno'onex. ¹⁰ U'yex ba' quin tucric a ba' ca' a betex a techexo'. Jach tsoy techex wa ca ts'ocsiquex a ba' ta toc arex ca bin a betex uch, caj manij turiri' u yaxq'uinin baje'rer. ¹¹ Ca' a ts'ocsex a ray a beyajex baje'rero'. Rajen ca' a ts'ajex ti' a wet acsa'orirex an ten bic u c'uchur a worex a ts'ajex ti'ob. ¹² Chen jach tsoy ca' a ts'ajex a baxuc mac c'ucha'an yor u ts'ic wa ju jach b^λjiri' u c'at u ts'ic. A to'onexo' m^λ' jic y^λn tucriquex wa m^λna' to'onex quir ic ts'iquex ti'ob.

¹³ A teno' m^λ' jin wa'arej ca' a r^λc ts'ajex ti' u jer tu cotor ba' a y^λn techex. M^λ' jin wa'arej hasta m^λ' ju p'at^λr techex. ¹⁴ A baje'rer, y^λn techex quir a jan^λnex, bayiri' xan y^λn techex quir a buquintiquex. Rajen ca' a yamtex a wet acsa'orirex quire' robob m^λna' ti'ob, a baywo' quetechex. Jaj ix t^λcoj ca' bin c'uchuc tu q'uinin wa y^λn ti'ob quir u jan^λnob, bayiri' quir u buquinticob, chen a techexo' m^λna' techex. Jeroj je' u yamtiquechex xan, a baywo' joc' quetechex xan. ¹⁵ A baxuco', je' u joc'ar an ten bic cu ya'aric ich tu ts'iba'an u t'^λn C'uj: "A mac a y^λn ya'ab quir u jan^λn m^λ' u p'at^λr tu r^λc jantaj. A mac a y^λn chichin quir u jan^λn m^λ' u ca' y^λn jant u yo'och." Baxuc cu ya'aric ich u t'^λn C'uj.

A Titojo' yejer u nupob

¹⁶ A teno' quin wa'aric ti' C'uj: "Bayo' C'uj quire' Tito." Ma' ja wirej, caj ts'a'b u tucur ten C'uj a Titijo' ca' u yajquin techex an ten bic ten quin yajquintiquechex. ¹⁷ Wa ber caj in wa'araj ti' Tito ca' tac yirechex, jach qui' yor u bin, quire' u c'at u yiriquechex.

¹⁸ Wa ber ca' bin tac Tito yejer u jerob ij quet acsa'orirob soc u yiricobechex xan. A je' ij quet acsa'orirex jach tsoy yirir ten ij quet acsa'orirex cax tu y^{an}nobi' quire' tsoy cu tsec'ticob u jach tsoyir u t^{an} C'uj. ¹⁹ A je' ij quet acsa'orirex caj teta'b ten a yacsm^{an}nob tu yorob ti' u t^{an} C'uj ich u cajar Jerusalén soc in wet binacob soc quir in p'^{atic} a taq'uino' a tuchi'ta'b quir u yamticob yet acsa'orirob. A tenobo' je' in beticob aro' soc mac cu ya'aricob jach carem C'uj, bayiri' xan, je' u yiricob mac wa jin c'atob xan in yamticob ij quet acsa'orirex. ²⁰ A tenobo' tan in c^{an}nanticob in b^{aj}job soc m^{an}na' mac cu bin u p^{aq}'uicob in pachob an bic quin man in j^{as}ticob a taq'uinechex, a tan a ts'i^{que}x ti' a wet acsa'orirex ich u cajar Jerusalén. ²¹ Ma' ja wirej, a tenobo' in c'at in beticob a ba'tsoyo' ^{ac}tan tu wich a mac a ti' y^{an}nob ich yoc'ocab.

²² A tenobo', je' in tuchi'ticobe' u jerob ij quet acsa'orirex soc ca' bin tacob yejer a ca'turo', a cu bin u p'^{atic} a taq'uinechex. A je' ij quet acsa'orirex in werob bic tabar u beyajob ti' C'uj. Jach ts'aja'an yorob u beyajob ti' C'uj. Jach qui' yorob quir u tarob tu y^{an}nechex quire' yerob ts'aja'an a worex a yamtiquex a wet acsa'orirex a otsich^ajob baje'rer. ²³ Wa ti' y^{an} mac tu y^{an}nechex a cu c'atic biquinin tan in tuchi'ticob Tito tu y^{an}nechex. Arex ti'ob,

raji' tsoy in wiric, bayiri' in wet beyajob. Raji' tan u c_Axtic bic tabar u betic tsoy techex. Bayiri', ti' a ca'turob a yet taracob, a cu tarob tu y_Anechex xan. Arex ti' a rac'obex a ca'turob, caj teta'b ten a wet acsa'orirex tera' soc ca' tacob yejer Tito tu y_Anechex. Ma' ja wirej, quire' robob u beyajob ti' u rac'ob, tsoy yiricob Cristo. ²⁴ Wa ber ca' bin c'uchucob a jera' a tin wa'arajob techex, toc esex ti'ob bic tabar a qui' acsiquex ti'ob soc tu cotor a wet acsa'orirex yerob a jach yajquintiquex a wet acsa'orirex. Ma' ja wirej, baxuc caj in wa'araj ti' tu cotor mac, a jach manan a yajquintiquex a wet acsa'orirex.

9

*U taq'uin a cu much'quinticobe' quir u ts'icob ti'
u yet acsa'orirob*

¹ Ma' ba'wir quin ts'ibtic techex bic tabar quir a yamtiquex a wet acsa'orirex. ² Quire' in wer a jach c'atex a yamtiquex a ti'obo'. Wa ber caj manen in tsec'tob u t'_An C'uj uch ich u ru'umin Macedonia tin wa'araj ti'ob: "Robob a mac a ti' y_An ich u ru'umin Acaya, ra'iri' u q'uinin turiri' yaxq'uin tan u much'quinticob u taq'uinob soc u yamticob u yet acsa'orirob." Baje'rer, quire' a ba' ta betajex tan u man u juminticob techex ich a mac a c_Aja'anob ich u ru'umin Macedonia tera'. Ra' tu chichquint u yorob soc u much'quinticob u taq'uinob quir u yamticob u yet acsa'orirob an ten bic techex tan a yamtiquex a ti'obo' xan. ³ Rajen tan in tuchi'tiquechex ij quet acsa'orirex quir u w_Ac'_As aricob techex. Ma' ja wirej, a teno' in c'at a much'quintiquex a taq'uinex tu ca bin a

yamtiquex a wet acsa'orirex cax m^λ' toy taquen tu y^λnechex quire' tin toc araj ti' mac ts'aja'an a worex a yamtiquex a wet acsa'orirex. ⁴ A ba' u ber in wet taracob a mac a cu tar ich u ru'umin Macedonia quir u tarob tu y^λnechex ca' bin c'uchucob jeroj m^λna' ta much'quintex a taq'uinex soc a yamtiquex a wet acsa'orirex. Chen a teno' caj in wa'araj ti'ob jach ts'aja'an a worex a yamtiquex a ti'obo'. Jeroj je' in ch'ic sur^λquire', bayiri' xan, a techexo' je' a ch'ic sur^λquirex quire' m^λna' a taq'uinex quir a yamtiquex a wet acsa'orirex. ⁵ Rajen caj in tucraj wa tsoy ca' bin xicob ij quet acsa'orirex soc p^λyber cu t'^λniquechexob. Jeroj, je' u c'asic techexob ti' a taq'uinex a ta toc much'quintex uch. Jeroj, ca' bin c'uchuquenob toc ts'oc a much'quintiquex ti'. M^λ' ja wirej, ch^λca'an yiric mac jach ts'aja'an a worex a yamtiquechex mac. Jeroj, m^λna' mac c'ucha'an yor ya'arej ten tin ts'^λraj a pachex a ts'iquex ti'ob a taq'uinex.

⁶ U'yex ba' quin wa'aric techex baje'rer. A mac a cu ts'ic chichin bayiri' je' u ts'ab^λr ten C'uj chichin xan. Chen a mac a cu ts'ic ya'ab, bayiri' je' u ts'ab^λr ten C'uj ya'ab. ⁷ Jujunturechex ca' a ts'ajex a ba' ca tucriquex ta worex, a ba' qui' a worex a ts'ic. Arex m^λ' u y^λn ts'ic wa m^λ' u c'at, m^λ' u y^λn ts'ic quire' ts^λrbir u pach. ⁸ M^λ' ja wirej, a C'uj o' y^λn u muc' quir u ts'ic techex a ba' a c'atex. Raji' je' u ts'ic techex soc jach manan y^λn techex. Bayiri' xan, quir a yamtiquechex a mac a c^λja'anob ich yoc'ocab. ⁹ Tu ts'iba'an u t'^λn C'uj cu ya'aric: A mac a jach tsoyo', raji' m^λ' u xupur ba', quire' jach manan u yamic a mac otsich^λjij. ¹⁰ M^λ' ja wirej, a C'uj o' a cu ts'ic u yijir ti' mac

quir u p_λq'uic soc y_λn yo'och quir u jantic. Raji' xan, je' u ts'ic techex tu cotor a ba' a c'atex. Je' u y_λntar techex soc y_λn techex quir a j_λsiquex ti' u jer mac. ¹¹ Raji' je' u ts'ic techex soc jach manan y_λn techex, a baywo' c'ucha'an a worex a ts'iquex ti' mac a m_λna' ti'. A baywo' xan, a mac a yacsm_λnob tu yorob je' u ya'aricob ti' C'uj: "Bayo' C'uj", quire' je' in j_λsic a ba' ca bin a tuchi'tiquex ti' a wet acsa'orirex ich u cajar Jerusalén. ¹² Quire' wa ber ca ts'iquex quir a yamtiquex a wet acsa'orirex, m_λ' u chen bin ts'a'bir ti'ob a ba' u c'atob, bayiri' xan, wa ber cu bin u c'_λmbirob a sijbir ti'ob je' u ya'aricob: "Bayo' C'uj", quire' a ba' ta sijex ti'ob. ¹³ Robob xan, je' u c'ujinticob C'uj quire' ch_λca'an yiricob mac tu cotor biquira' a pixamex. M_λ' ja wirej, ch_λca'an yiricob mac taj ta c'_λmajex u jach tsoyir u t'_λn C'uj ti' Cristo. Bayiri' xan, tan a yamtiquex a wet acsa'orirex ich u cajar Jerusalén, bayiri' xan tan a yamtiquex u jer mac. ¹⁴ Robob je' u t'_λnicob C'uj techex quire' jach manan tu yirob a yajquintiquex a ti'obo'. M_λ' ja wirej, je' u yiricob bic tabar a C'ijo' tu yesaj u jach tsoyir u pixam soc c'ucha'an a worex a betiquex tsoy ti'ob. ¹⁵ Baje'rer ca' ij carex ti' C'uj: "Bayo' C'uj", quire' tu tuchi't u parar te' ich yoc'ocab. M_λ' ja wirej, a ba' tu betaj to'onex C'uj jach manan tsoy. M_λ' c'ucha'an ij corex ij carex bic jach manan co'oij a ba' tu betaj to'onex.

10

Pablo u b_λjiri' cu c_λnantic u b_λ

¹ A teno' Pablojen, y_λn in t'_λn quir in wa'aric techex. Chen a teno' chanber quin

qui' t'äniquechex an ten bic Cristo t'änij mac ber ti' cäja'an uch ich yoc'ocab. Yän mac tu yännechex baje'rer tan u ya'aricob ten: "Wa ti' yän tera' u bäljiri' Pablo, chanber u t'än, quire' mä' c'ucha'an yor ya'aric tenob. Chen wa ber ca' bin tsibanañquenob ich ju'un, jeroj jach chich cu t'äniquenob." ² U'yex ba' quin wa'aric techex in wet acsa'orirex. Juts' a bäljex ti' tu cotor a ba' mä' tsoyi', soc ca' bin uruquenob tu yännechex jeroj tsoy in tsicbar techex. Tin t'än, mä' a c'atex in q'ueyiquex bic tabar ca cuxtarex baje'rer. Chen wa ti' toy yän mac a tan ya'aricob tan in teticob in bälj quir in beyaj ti' C'uj, jeroj robob ca' in chich arej ti'ob añañtan tu wichob. ³ Jach taj, a teno' chen xiben, chen a teno' mä' tan in betic u beyaj C'uj yejer in bäljiri' in t'än. ⁴ Mä' ja wirej, in bäljiri' mä' jin añañtej bic tabar in betic ca' joc'ac u tsoyir u beyaj C'uj. Quire' yejer u bäljiri' u t'än mac mä' c'ucha'an yor ti'. Rajen a C'uko' cu chichquintic in muc' quir in beyaj ti' soc c'ucha'an in wor in ch'esic a c'aso'. ⁵ Quire' u muc' C'uj a tu ts'aj ten C'uj, jeroj c'ucha'an in wor ti' a mac a cu nunquicob in t'än an bic cu tsicbarob. Mä' ja wirej, robob tan u añañticob bic u nunquicob in t'änob a quin tsicbar quire' mä' u c'atob yerticob biquira' C'uj. Ber ca' bin ts'ocac u c'uchur in wor ti' u t'änob, a cu tus tucricob, jeroj je' in wesic ti'ob C'uj soc u qui' acsicob tu yorob ti' Cristo. ⁶ Wa ber chäca'an yiriquen tu quibob t'än a tin wa'araj techex jeroj c'ucha'an in muc' in q'ueyic a mac a mä' tu quibob a ray t'änno'.

⁷ Arex ten biquinin ca chen iriquex u winquirir mac, chen mä' a werex a ba' ti' yän tu yor? Arex ti' a mac a cu nunquicob in t'änob a cu ya'aricob

u beyajob ti' Cristo xan, a tenobo' quin beyajob ti' Cristo xan. ⁸ Cax c'ucha'an in worob in wa'aric techex ya'ab in t'nob an bic ts'a'b in beyajob ten ic Jaj Ts'urirex Jesús, chen mΛ' jin ch'a'ej suraquirob ti' in t'nob. Quire' in werob raji' ic Jaj Ts'urirex a tu ts'aj in beyajob soc in tsicbarob u t'Λn quir in chichquinticob a worex ti' u t'Λn Jesucristo. A tenobo' mΛ' tan in tupsicob a worex ti' u t'Λn C'uj an bic u jer mac tan u beticob. ⁹ MΛ' a yΛn tucriquez tan in c'Λnicob ju'un quir in jac'sicob a worex techex. ¹⁰ MΛ' ja wirej, yΛn mac tan ya'aricob: "A Pablojo' wa ber cu ts'ibtic mac quir u tuchi'tic ti'ob ju'un, jeroj, chich cu ya'aric mac. Chen wa ber u bΛjiri' cu c'uchur tu yΛnob jeroj, chanber cu t'Λnic mac. A Pablojo', quij ya'aricob, chen t'Λnit'Λn u ca'." Baxuc cu ya'aricob tenob. ¹¹ Arex ti' mac a tan u ya'aricob baxuco'. Je' yerticob wa mΛ' jin chich arejob ti' mac ca' bin c'uchuquen. MΛ' chen ich ju'un quin chich aricob ti' maqui'. Bayiri' xan, c'ucha'an in worob in wa'aricob ti' mac ca' bin c'uchuquenob tu yΛnechex.

¹² Chen a tenob mΛ' c'ucha'an in worob in wa'aricob bin ca' in betob an ten bic u jer mac tan u beticob tu yΛnechex, a mac a tan u nacsicob u bΛjob. MΛ' ja wirej, cu tus tucricob u ne'erob ba', chen u jer mac mΛ' yerobi', chen robob jach yaj u cΛnicob ba'. Cu chen cΛxticob bic tabar jach manan ti' u yΛjcamsayΛjirob. ¹³ A tenobo' mΛ' tan in wa'aricob caremenob quire' a ba' quin wa'aricob. A ba' quin beticob ra' in wa'aricob ti' mac. A tenobo', jari' in c'atob in wa'aricob techex ti' u beyaj a tu ts'aj tenob C'uj. Raji' tu ts'aj in beyajob tu cΛja'anechex ich u cajar Cor-

into. ¹⁴ Ma' ja wirej, C'uj tu ts'aj in beyajob ca' xiquenob beyajob tu y^λnechex. A tenobo' m^λ' in b^λjiri'ob quin tucricob in binob tu y^λnechex. Chen a tenobo' p^λyber y^λn tarenob in tsec'ticob techex u jach tsoyir u t'^λn Cristo. Pachir caj tar u jer y^λjseq'uirob u t'^λn C'uj. ¹⁵ A tenobo' in chen c'at in wa'aricob techex in beyajob a quin beticob. A teno' m^λ' jin wa'arob techex a ba' beyaj tu betaj u jer mac. Baje'rer, in c'at in wiricob u chichtar a muq'uex ti' u t'^λn C'uj soc tu c^λja'anechex jeroj, c'ucha'an in wor in beticob techex a tsoyo'. ¹⁶ Jeroj pachir, c'ucha'an in worob xan in bin in tsec'tob u t'^λn C'uj ich u jer cajarob a ti' y^λn p^λchirechex. Chen a tenobo' m^λ' jin bin in tsec'tob u jach tsoyir u t'^λn C'uj tu toc y^λn a yacsm^λnob tu yorob. A tu m^λ' ju tsec'm^λnob mac, ti' quin binobi'.

¹⁷ Jeroj a mac u c'at yubej ya'ara': "Jach care-mech a techo", quire' u beyaj a tu betaj ca' u ya'arej: "Carem in Jaj Ts'urir a ti' y^λn ich ca'anan a cu chichquintic in muc' quir in beyaj ti'." Arej m^λ' u b^λjiri' aric wa carem an ten bic u b^λjiri' tu betaj u beyaj. ¹⁸ Ma' ja wirej, a mac a cu joc'ar tu tsoyir quire' a ba' tu betaj ti' ic Jaj Ts'urirex, raji' a mac cu bin arbir ten ic Jaj Ts'urirex: "Jach tsøy a beyaj a techexo", m^λ' u joc'ar tu tsoyir quire' u b^λjiri' tu ya'araj.

11

Pablo yejer a tus y^λj^λnirob Cristo

¹ A tenobo' tan in tsicbarob irenob a mac a cu sosoc tsicbar. Chen muc'tex a ba' in c'at in wa'aric techex. ² A tenobo' queten yejeren C'uj, jach manan in c'atob m^λ' a p^λtiquex Cristo. M^λ'

ja wirej, tin yam techex soc a wacsiquex ta worex ti' Cristo. A baje'rero' an ten bic a xquico' a tabar u ch'ic u mam, a cu chen yajquintic a mac a cu bin u raq'uintej. Ra' irej u t'ʌn a tabar in wa'aric techex tera'. A mac jach manan ca' a yajquintex. raji' Cristo. ³ An ten bic Eva caj tus ara'b ten quisin baxuc quin ch'ic u sajquirirob wa je' u tus aric techex mac soc a p'ʌtiquej Cristo. ⁴ Ma' ja wirej, cax mac a cu c'uchur tu yanechex wa ba' cu camsiquechex u tirir ti' a ba' tin camsechexob uch ti' Cristo, ra' ca qui' sariquex a xiquinex ti'. Ma' ja wirej, u tirir ti' a ba' cu camsicob ti' u Taj'or u Pixam C'uj. U tirir ti' a ba' cu camsicob ti' u jach tsoyir u t'ʌn C'uj. A ba' cu camsicob ra' mʌ' quet yejer a ba' tin camsechexob uch. ⁵ Robob a mac a cu camsiquechex a ray t'ʌnob cu tus tucricob u bʌjiri': "Jach caremenob", chen a tenobo' mʌ' jin tucrej ti'ob wa jach carem tenobo'. ⁶ Cax mac cu ya'aric mʌ' in werob bic tabar in tsicbarob soc tsoy yubicob mac in t'ʌnob wa ber quin tsicbarob. Chen a tenobo' in jach erob a ba' quin camsicob. Ma' ja wirej, a techexo' ta qui' u'yex in t'ʌnob a tin ts'ibtechexob caj in camsajechexob uch.

⁷ Ta tucrex wa tin betajob c'as quire' mʌ' tin c'ataj techexob in taq'uin wa ber tin wa'ara techexob u jach tsoyir u t'ʌn C'uj? Soc in beticob tsoy techex chich beyajnʌjenob quir in jaric in taq'uinob soc in janʌnob wa ber tin camsechexob u t'ʌn C'uj uch. ⁸ Wa ber tan in beyajob uch tu quin camsiquechex u t'ʌn C'uj ta cajarex, u jer a yacsmʌnob tu yorob ich u jer u cajarob tu ts'ajob tenob taq'uin quir in mʌnic a ba' in c'atob. ⁹ Wa ber jamach cʌja'jenob ich a cajarex uch yʌn u

q'uinin m_λna' ba' quir in jan_λnob. Chen m_λ' jin c'ataj techex a ba' in c'atob. Chen robob a mac a cu tar ich u ru'umin Macedonia, ij quet acsa'orirex, robob caj u ts'ajob tenob a ba' in c'atob uch. A baywo' m_λ' jin c'atechexob a ba' in c'at uch. M_λ' biq'uin je' in c'atechexob a ba' in c'at soc m_λ' jin pecsob a worex. ¹⁰ M_λ' ja wirej, quire' tin wacsaj tin worob ti' Cristo, taj quin wa'aricob. Jach jaj m_λ' jin bin in c'atob taq'uin ti' a mac a yacs_λnob tu yorob tu c_λja'anob ich u ru'umin Acaya. Jach qui' in worob quire' baxuc caj in betob. ¹¹ Biquinin tan in wa'ariquechexob a ray t'_λno'? M_λ' a tucriquez wa m_λ' jin yajquin techexob? A C'uko' yer jach manan in yajquintiquechexob.

¹² M_λ' ja wirej, a tu c_λja'anechex m_λ' jin ch'ajob a taq'uinex soc a mac a cu camsicob techex m_λ' c'ucha'an yorob ya'aricob, robob cu beticob an ten biquenob quin beticob. A mac a cu tus aricob robob ra'iri' yejerenob wa ber cu camsicob an ten biquenob a tenobo' quin camsicob. ¹³ A ray maco' a cu camsicob a mac a quin tsicbar techexob baje'rer, robob cu tus aricob wa robob u jach _λj tseq'uirob u t'_λn Cristo, chen m_λ' taji' quire' cu tus aricob mac. Robob cu tus ets'icob _λj tseq'uirob u t'_λn Cristo. ¹⁴ M_λ' u y_λn jac'arex a worex quire' a ba' caj in wa'ara techexob quire' u b_λjiri' a quisino' cu tus c'axic u b_λj soc ch_λca'an yirir irej wa y_λjmasir u t'_λn C'uj a cu tar ich ca'anan. ¹⁵ Rajen raji' taj wa mac a cu beyajob ti' quisin xan cu tus esicob u b_λjob irej wa tsoy yor mac. Chen bic tabar u cuxtarob ich yoc'ocab mac je' u bin ts'abir u muc'yaj ca' bin c'uchuc tu q'uinin quire' a ba' caj u betob.

A ba' caj u muc'taj Pablo quire' y_λjtseq'uir C'u_j

¹⁶ U'yex ba' quin w_λc'_λs aric techex, chen m_λ' a y_λn tucriquex wa tin s_λt in tucur quire' a ba' quin bin in wa'arej techex. Chen wa ca tucriquex tin s_λt in tucur jeroj, cha'ex in c'_λs tsicbar in b_λjiri'e'. ¹⁷ Ra' quin tsicbar techex baje'rer m_λ' ju ts'aj in tucur C'u_j'. In b_λjiri' quin tsicbar an ten bic mac m_λna' u tucuro', a mac a cu tsicbar u b_λjiri'. ¹⁸ A techexo' ta wirex ya'ab mac a cu camsicob mac, cu tsicbarob tu cotor a ba' cu beticob. Rajen a ten xano', in c'at in tsicbar techex a ba' tu cotor quin betic. ¹⁹ Quire' baje'rer ca tus tucriquex wa ja ne'erex ba' tu cotor. Jeroj, c'ucha'an a worex baje'rer soc nema' biquechex yejer, cax yejer u t_λn a cu tar a mac a tu s_λt u tucur. ²⁰ M_λ' ja wirej, a mac a cu camsicob techex baje'rer tan a ts'urintiquex. Chen a techexo' ti' toy ca muc'tiquex ti'ob, cax a ba' cu beticob techex. Robob jari' u c'at u ch'icob a taq'uinxex, cu yocarob u c'_λniquechex. Cu ya'aricob: "Jot a techexo'", cu tac'j_λts'i quechex, chen ca muc'tiquex. ²¹ A tenobo' cax suraque-nob in wa'arej. A tenobo' m_λ' chich in worob quir in beticob a baxuc a caj u betob a tus ets' y_λjtseq'uirob u t_λn C'u_j. Chen wa robob cu w_λc'_λs tsicbar tsoy u b_λjiri'ob. A tenobo' c'ucha'an in wor in tsicbarob jach manan tsoy in b_λjiri'e' jaj ix t_λcoj ca wa'ariquex a Pablojo' caj u s_λt u tucur.

A ray maco' a cu camsicob techex, cu tsicbarob a ba' caj u betajob, a cu tetic u b_λjob. A tenobo' tabar in wa'aric techex in b_λjiri' cax ca wa'ariquex tin s_λt in tucur quire' c'ucha'an in worob ti'. ²² A ray u winiquirob judiojo' cu ya'aricob: U winiquirenob judío, baxuc a teno' u winiquiren judío. Robob cu

ya'aricob u winiquirob u ru'umin Israel, baxuc a teno' u winiquireno' u ru'umin Israel. Robob cu ya'aricob: Raji' Abraham u nunquirob, baxuc ten xan, raji' Abraham in nunquir xan. ²³ Robob cu ya'aricob cu beyajob ti' Cristo. Chen a ten xano', jach manan quin betic u beyaj Cristo, mΛ' quet u beticob. Tin t'Λn, ca tucrriquej xach taj caj in sΛt in tucur quire' an bic tabar tan in tsicbar techex. Chen a teno' jach manan in beyaj, robob mΛ' quet u beyaj yejeren. Jach manan muc'yajnΛjen uch caj u jΛts'ob in pach a ti'obo' mΛ' jach manan a ti'obo'. Ya'ab u tenin caj purenob tu cu ma'cΛr winicob, mΛ' jach manan a ti'obo'. Jach ya'ab u tenin tabar in quinsa', mΛ' jach manan a ti'obo'. ²⁴ Ti' in wet winiquirob judío cinco u tenin caj u jach ts'aj in muc'yaj, caj u jΛts'ob in pach treinta y nueve u jats'Λr in pach. ²⁵ Tres u tenin caj u jΛts'ob in pach yejer che', tenin tu ch'inob in jo'r, tres u tenin u chemin jur tu quin man ich c'ac'nab. Ti' yΛnen turiri' u q'uinin yejer turiri' ac'bir ti' yΛnen ich c'ac'nab quire' jur a chemo'. ²⁶ Tu quin bin in tsec't u t'Λn C'uj ya'ab u tenin tan in man ich bej orac u cuchen u burij ya'arir. Orac quinsaqueten a mΛ' u winiquirob judío. Tu quin tsec'tic u t'Λn C'uj ich u cajarob orac quinsaqueten xan. Orac quinsaqueten a mac a mΛ' taj tu yacsob tu yorob. Tu quin man ich tΛcay ru'um ti' muc'yajnΛjen. Tu quin ch'Λctic c'ac'nab ti' muc'yajnΛjen xan. ²⁷ Ya'ab muc'yajnΛjen quire' wi'ijen. Muc'yajnΛjen quire' uc'chΛjen. Ya'ab muc'yajnΛjen quire' chich in beyaj. Ya'ab u tenin mΛna' quir in wenΛn. Ya'ab u tenin wa ber mΛna' in wo'och mΛna' in jantej ba'. Ya'ab u tenin muc'yajnΛjen ich chΛcΛm quire' jach

que'er. Ya'ab u tenin muc'yajn^λjen quire' m^λ' ya'ab in noc' quir in buquintic.

²⁸ M^λ' jari' aro', quin muc'yaj jujuntur u q'uinin wa ber quin wu'yic tin wor u yajirir in wet acsa'orirob cax tu y^λnob. ²⁹ Wa ber quin wiric tu y^λn a yacsma^λnob tu yorob a m^λ' chichac yorob ti' u t^λn C'uj quin tucric an ten bic cu tucricob xan. Wa ber q'uin ti' y^λn mac a yacsma^λnob tu yorob caj tus ara'b ten mac soc u yacsicob u si'pir quin tucric cax cu yajtar in wor. ³⁰ Jaj ix ti' wa quin wu'yic tsoy in wor in b^λjiri'e' je' in wu'yic tsoy in wor in b^λjiri'e' ti' a ba' cu yesic a ba' m^λ' c'ucha'an in wor ti'. ³¹ A ba' caj in wa'araj techex, a C'uko' yer wa taj a ba' quin wa'aric. Raji' C'uj u Tet ic Jaj Ts'urirex Jesucristo. Raji' in c'at in wiric tu cotor mac ca' ya'arob munt q'uin ti' C'uj: "Jach caremech C'uj!" ³² Ich u ru'umin a cu reyintic u rey Aretas, tu y^λn u cajar Damasco. Raji' a mac gobernador tu ric'saj u t^λnin soc u c'aricob u jor u pa'te'ir tunich soc u c^λnanta'r ten soldado. M^λ' ja wirej, u c'at u chuquiqenob ca' u ma^λquenob tu cu naj maquicob mac. ³³ Chen puts'en quire' in wet acsa'orirob caj u yacsajenob ich yaja xac caj u joc'sob ich jor a ti' y^λn ich u pa'te' tu cu cha'anob. Ra' u pa'tem^λnob u cajarob. Jeroj, caj u yemsajenob, a baywo' caj puts'en.

12

A ba' tu w^λy^λc'taj Pablo ti' C'uj

¹ M^λ' ba'wir quin wa'aric techex ti' a ba' tin betaj soc tsoy a wiriquenex. Tin t^λn, jach tsoy ca' in wa'arej techex a ba' tu yesaten Jesús uch. Je' in

wa'aric a ba' tin wiraj caj w_λyac'n_λjen. ² Baje'rer y_λn ya'ab yaxq'un caj in wacsaj tin wor ti' Cristo. Y_λn catorce yaxq'un caj payen ich ca'an an tu y_λn ic Jaj Ts'urex Jesús. Chen m_λ' in wer wa yejer in winquirir caj binen, wa m_λ' yejer in winquirir caj binen, wa tin chen w_λy_λc'taj. Jariri' u b_λjiri' C'uj yer ba' in ber a teno'. ³ Raji' C'uj yer wa binen yejer in winquirir wa m_λ' binen yejer in winquirir. ⁴ Chen in wer a Jaj Ts'uro' caj u p_λyajen tu c_λja'an ich ca'an an. A baywo' caj in wu'yaj u t'_λn a m_λ' u cha'b_λr in tsicbar techex quire' a ba' caj u ya'raj ten. ⁵ Quire' a ba' caj in wu'yaj ich ca'an an c'ucha'an in wor in tsicbar tsoy in b_λjiri'e', chen a teno' m_λ' tsoy in tsicbar in b_λjiri'e' chen je' in tsicbar tsoy in b_λjiri'e' a ba' quiri' m_λ' c'ucha'an in wor ti'e'. ⁶ Cax wa jin c'at in tsicbar tsoyen chen aro' m_λ' socsoc tsicbar in ca'i', a jera' tan in wa'aric jach taj, barej, m_λ' jin bet aro'. Jari' in c'at a wirenex bic tabar quin cuxtar, bayiri' a ba' ta wu'yajex in wa'aric techex soc c'ucha'an a worex a wiriquex wa taji'.

⁷ A ray t'_λno' caj in wu'yaj uch jach manan tsoyir. Chen C'uj m_λ' u c'at yiriquen wa quin tus tucric wa jach caremen quire' a ba' caj in wu'yaj ich ca'an an uch. Rajen raj'i cu cha'ic u tar quir in muc'yaj ra' irej wa q'ui'ix tuj u tup in b_λq'uer a quisino'. ⁸ Quire' a ray muc'yajo' caj in t'_λanaj C'uj m_λna' u nup u tenin ca' u ruc'sej ten. ⁹ Chen Cristo caj u ya'raj ten: "Jari' soc a wer wa jin jach yajech soc ch_λca'an yiric mac ten, quij Jesús, tan in chichquintic a muc' Pablo tu ca beyaj a techo'." Baxuc caj u ya'raj ten. M_λ' ja wirej, a baxuco' ch_λca'an yiric mac Cristo cu chichquintic in muc'

ti' a ba' quin betic. Rajen qui' in wor wa mΛ' chich in muc'. ¹⁰ Rajen qui' in wor wa ber quin muc'yaj. YΛn q'uin wa ber cu p'astiquenob mac. YΛn q'uin wa ber mΛna' ba' quir in jantic. YΛn q'uin wa ber cu chuquicob in pach mac. YΛn q'uin wa ber quin muc'yaj quire' u beyaj a quin betic ti' Cristo. Chen tan in qui'quintic in wor quire' wa ber chΛca'an yiric mac wa mΛ' chich in muc' jeroj tun, chΛca'an yiric mac raji' Cristo tan u chichquintic in muc' ti' a ba' quin betic.

A Pablojo' tan u tucric ti' a mac a yacsmΛnob tu yorob ich u cajar Corinto

¹¹ A teno' quin socsoc tsicbar tsoy in bΛjiri'e' quire' a techexo' caj a ts'Λrex in pach in wΛc'Λs tsicbar in wΛc'Λs bΛjiri'e'. Biquinin mΛ' ja ts'ib tenex tsoyen ti' u Λj'ets' tseq'uirob u t'Λn C'uj a tu yΛnechexo'. MΛna' mac jach tsoy quetenob bax-uquenob tsoyirenobo' cax cu ya'aricob: "Jotenob a tenobo'." ¹² Wa ber ti' yΛnen tu yΛnechex uch caj in tsicbΛtaj techex u t'Λn C'uj soc chΛca'an yiricob mac tu tuchi'ten Cristo quir in beyaj ti'. Quire' ich in beyaj a caj in betaj ti' Cristo nemΛ' biqueni', caj in muc'taj tu cotor a ba' caj u ya'araj mac. A carem beyajo' a ba' mΛ' yirmΛnob mac uch raji' cu yesic techex jach jaj tu tuchi'ten Cristo. ¹³ A teno' caj cuxrΛjen uch tu yΛnechex an ten bic in cΛjtar tu yΛn tu cotorob mac a yacsmΛnob tu yorob. Jari' mΛ' jin c'atej techex ca' a jansenex. Ca' a jawsenex wa mΛ' tsoy caj in betaj techex. ¹⁴ Jeroj tabar in wΛc'Λs tar in wirechex, ra' a mΛna' u nup u tenin in tar in wirechex. Chen a teno' mΛ' jin c'Λs c'ata techex chichin a taq'uinx wa ber

ca' c'uchuquen tu y_λnechex. A teno' je' in wesic techex in yajquintiquechex. M_λ' ja wirej, a teto' cu p'isic u b_λj u c_λxt u taq'uin quir u c_λnatic u chan pararob. A chan pararobe', m_λ' ju c_λnant u tet.

¹⁵ A teno' quin qui'quintic in wor ca' in r_λc xup in taq'uin yejer tu cotor a ba' ten y_λnin quir in yamtiquechex soc a taquic a b_λjex. Cax quin xupic in muc' xan quire' techex, qui' in wor. Chen tin t'_λn cax jach manan quin yajquintiquechex a techexo'. Chen a techexo', m_λ' ja neyajquintenex.

¹⁶ A techexo', a werex wa ber y_λn ba' in c'at uch, m_λ' jin c'_λs c'ataj techex chichin. Chen y_λn mac tu y_λnechex a tan u p_λq'uicob in pach, tan u ya'aricob tan in tusaric techex. ¹⁷ A techexo' ca tucriquex wa caj in tuchi'taj mac soc u tus jaric u taq'uin tu y_λnechex? M_λ' jin tuchi'taj mac, quij.

¹⁸ Wa ber caj in tuchi'taj Tito quir u t'_λniquechex, yet binac u jer ij quet acsa'orirex. Arex ten wa caj u jarajob taq'uin tu y_λnechex. Techex, a werex a Titojo' caj u betaj an ten bic a teno' quin betic. A Titojo' u chen c'at u betej tsoy techex yejer u t'_λn a caj u camsechex. Chen m_λ' ju c'at u taq'uin techexi'.

¹⁹ M_λ' a y_λn tucriquex wa quin tsicbar a je' t'_λna' ti' techex soc tsoy a wiquenex, m_λ' ra'. M_λ' ja wirej, a t'_λno' a quin tsicbaro' ra' u c'at Cristo ca' tsicban_λquen techex. A t'_λno' a quin tsicbar techex in wet acsa'orirex quin c_λxtic bic tabar quin chichquintic a worex ti' u t'_λn C'uj. ²⁰ M_λ' ja wirej, sajquen ca' bin c'uchuquen tu y_λnechex wa quin wiriquechex, jaj ix t_λcoj, je' in wiric techex m_λ' ja manex tu tsoyir. Jaj ix t_λcoj, je' in wiriquechex ca nunquiquex u t'_λn a rac'obex, wa quin wiric

q'uetex a worex techex. Wa jix ti', ts'i quex, wa jix ti' ca c^{ax}tiquex ba' ti' a nonoj b^ajiri'ex, wa jix ti', cu ya'aricob c'as ti' u yet acsa'orirob, wa jix ti' cu p'asticob u yet acsa'orirob, wa jix ti' y^an mac a cu tus tucric u b^ajiri' wa jach carem. Wa jix ti', cu p'usicob u yorob u yet acsa'orirob. Tin t'^an, m^a' ja bin a quib in tsicbar techex an bic tabar a c'atex ten, quire' je' u joc'ar in wor quire' c'as ca betiquex. ²¹ Rajen sajquen ti' a ba' quin bin in wirej ca' bin c'uchuquen tu y^anechex. Jeroj, je' in ch'ic suraquir ^ac^{at}tan tu wich C'uj quire' a ba' ca betiquex. A teno' tin t'^an, je' in woc'ar wa quin wiric mac m^a' ju j^as u b^ajob ti' a c'aso', bayiri' ca manex yejer xquic a toc y^an u mamo'.

13

A Pablojo' cu t'^anic u yet acsa'orirob

¹ Baje'rer, je' in w^ac'^as tar in wirechex tu y^anechex, aro' m^ana' u nup u tenin caj taren in wirechex. Wa y^an mac u c'at u ta'quic u jo'r u yet acsa'orirob, jeroj ca' u p^ayej dos wa m^ana' u nup y^ajirirob soc u joc'ar u tajir. ² Wa ber ti' toy y^anen yejerechex uch, caj in wa'araj techex, cax baje'rer, m^a' ti' y^anen yejerechex tan in w^ac'^as ara techex. A teno' caj in wa'araj mac a caj u p^ay u si'pirob uch, bayiri' caj in wa'araj techex uch xan, je' in w^ac'^as tar tu y^anechex, jeroj m^a' jin bin in jaws u si'pirob. ³ Jeroj je' a tumtic a wirex a ca c^{ax}tiquex wa Cristo cu ts'ic u t'^an ten quir in tsicbar techex. Ma' ja wirej, a Cristojo' m^a' raji' chan ber u t'^an wa ber cu p^ayiquechex chich u t'^an. ⁴ Cax Cristo m^a' ju yesaj wa chich u muc' wa ber caj sinij yejer u cruz,

chen baje'rer cuxa'an, bayiri'tan u man ich u muc' C'uj. Baxuc, a ten xano', bayiri' xan, in wet man Cristo, a baywo' je' u chichquintic in muc' C'uj ich u t'an, a quin bin in tsicbar techex wa ber ca' bin c'uchuquen tu yanechex.

⁵ Tumtex ta wor a wac'sas ba'jiri'ex wa tan a qui' acsiquex ta worex ti' Cristo soc a werex wa ja wet manex Cristo. Wa ma' a wet manex yejer Cristo ma' taj a wacsm'anex ta worexi'. ⁶ A teno'tin t'an, je' a wu'yiquek ta worex wa taj in wet man Cristo, soc quet bayiri', a werex ma' jin tus ar techex. ⁷ A teno' caj in chich t'ana C'uj soc ma' a palyiquek a si'pirex, chichin. Chen ma' jin tucr in beyaj a tin betaj a tu yanechex. Jari' in chen c'at ca' manaquechex tu tsoyir. Tsire'ej u jer cu tucricob ma' tsoy in beyaj. ⁸ A teno' ma' nanij in ma'quintic mac a cu yacsic tu yor a ba' taj. Ma' ja wirej, tan in beyaj quire' in c'at wa mac ca' u yacsej tu yor. ⁹ Rajen chen qui' in wor wa ber quin wu'yic yoc'or ten wa ma' tan in chich tsicbar. A teno' in chen c'at ca' chichac a worex ti' u t'an C'uj. A teno' quin t'anic C'uj techex soc a qui' manex tu tsoyir. ¹⁰ Ma' toy xioken tu yanechex quir in t'aniquechex tan in tuchi'tic techex a je' ju'una'. A je' ju'una' cu chich aric techex cax ti' yannen nachir. A je' beyaja' a quin betic ra' tu ts'a ten C'uj a teno'. A teno' caj in caxta bic tabar in chichquintic a worex ti' u t'an C'uj. Ma' jin caxte bic tabar in ch'esic a wacsiquex ta worex ti' Cristo.

¹¹ Baje'rer in wet acsa'orirex ca' u yamtej techex C'uj. Caxtex a manex tu tsoyir. In c'at C'uj ca' u yamtej techex soc ma'na' ba' ca' tucriquex. Ca' a pacran yajquint a bajex. Wa ta nuncajex u t'an a wet acsa'orirex, sisquint a worex. Wa baxuc

ca betiquex, jeroj, tan a betiquex a ba' u c'at C'uj. Bayiri' xan, a C'ajo' mΛ' ju jΛs u bΛj techex munt q'uin. ¹² Ca' a pacran qui' t'Λn a bΛjex soc yerob mac a wet acsa'orirex. ¹³ Tu cotor a wet acsa'orirex yejero'onex tan u t'Λniquechex.

¹⁴ A teno' in c'at ca' u yam techex ic Jaj Ts'urirex Jesucristo. Ca' u yajquin techex C'uj. Ca' u pΛy a berex u Taj'or Pixam C'uj. Soc a wet manex yejer u Taj'or Pixam C'uj.

A quet u t'ano' a ric'beno'

New Testament in Lacandon (MX:lac:Lacandon)

copyright © 1978 Wycliffe Bible Translators, Inc.

Language: Lacandon

Translation by: Wycliffe Bible Translators, Inc.

Lacandón [lac], Mexico

Copyright Information

© 1978, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Lacandon

© 1978, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files
dated 29 Jan 2022
e946bbf1-bc43-5557-a783-a3482d69cb01